



Protocol

dalla seduta dil cussegl da vischnaunca,
venderdis, ils 24 d'avrel 2009, allas 19³⁰ – 21⁵⁰ uras
ell'aula en casa da scola Cons

Presidi: Robert Cajacob

Actuar: Ervin Maissen

Presents:

- | | | |
|-----------------------------|---|---|
| a) Cussegl | Clemens Berther
Robert Cajacob
Bernadetta Caminada-Mühlebach
Giusep Columberg
Emerita Flepp-Degonda
Victor Flepp
Martina Gienal | Rita Huonder-Tenner
Jordana Lozza-Desax
Pirmin Lozza
Pader Vigeli Monn
Flavio Murer
Alfred Spescha |
| b) Suprastonza
communala | Dumeni Columberg
Hans Huonder | Roger Tuor |
| c) Perstgias | Heinrich Berther
Madlen Deflorin-Spescha | Cecilia Maissen-Desax
Iso Mazzetta |
| d) Canzlist
communal | Andri Hendry | |
| e) Hosps | 3 | |

Plaid da beinvegni *dil president dil cussegl da vischnaunca.*

"Jeu beneventel Vus a nossa tiarza seduta dil cussegl da vischnaunca dalla perioda d'uffeci 2009/12. El rapport da gestiun per igl onn 2008 che nus havein oz sin tractanda, scriva nies president communal sco empren: "Igl onn 2008 ei staus in bien onn per la vischnaunca da Mustér". Sin la davosa pagina declara el: "Las perspectivas generalas ein buca fetg encuraschontas. Suenten ils stempraus sil camp finanziel e prognosas negativas sederasa la tema d'ina crisa economica mundiala. Gest en in tal mument drova ei ina clara voluntad. Gest ussa ston tuts semetter els stadals e nezegiar tuttas pusseivladads per instradar novas activitads".

Il president communal visa sin la tema d'ina crisa economica mundiala che ha segir era consequenzas negativas per nossas regiuns. Di per di udin e legin nus dalla crisa da finanzas che sederasa sigl entir mund e dallas milliardas ch'ei idas a piarder. Buca quellas milliardas fan a mi ils pli gronds fastedis, mobein la gronda sperdita da plazzas da lavur. Senza lavur e fadigia va la populaziun ed il consum en general anavos. Quei sentin nus ellas regiuns muntagnardas aunc pli fetg ch'els marcaus. Il carstgaun en pitgiras vegn malcontent, malsaun e per part schizun malsegirs. Las medias rapportan dils daners ch'ei i a piarder, dalla buorsa, denton strusch ton dil carstgaun respectivamein dil luvrer. Aud'ins il plaid restructuraziun, stat pil pli ina reducziun dils plazs da lavur avon esch. Stedi suonda sin quei ina reacziun positiva tier la buorsa. Quei dat da patertgar e provochescha damondas. Drova ei in summa aunc il luvrer respectivamein il carstgaun? Ei il spert gudogn alla buorsa pli impurtonts che l'occupaziun, ch'il product dalla lavur dil carstgaun? Vegn il carstgaun emblidau dil carstgaun? Nus astgein buca emblidar, ch'igl ei aunc adina il carstgaun ch'ei il consument da tutta producziun. Senza carstgaun negina producziun, denton era negin consum. Ei schai pia vid il carstgaun, vi da nus, da realisar che nus essan cheu in per l'auter. Aschia stuein nus era plaunsiu veser en, che cunfins da vischnauncas astgan el temps dad oz buca pli tener si il svilup necessari. Ei drova stretga e seria collaboraziun eifer nossas vischnauncas, nossa regiun. Il temps da saver viver persuls sin ina insla senza haver quitaus e senza esser visaus vi sin il, ni obligaus al concarstgaun, ei definitivamein vargaus. Il realisar quella verdad savess esser la via per la reconvalescenza da nossa situaziun da crisa e per in bien futur era en las regiuns muntagnardas, en nossas pintgas, per ils centers pli e pli nunimpurtonts, vischnauncas.

Mortoris:

Cun in bien patratg lein nus seregurdar dad Emil Manetsch (Gonda/Ruosna), naschius ils 20 da november 1934 e morts ils 20 da mars 2009; Johanna Truaisch (Sogn Gions), naschida ils 24 da zercladur 1917 e morta ils 20 da mars 2009; Valentin Levy-Gmür (Gonda/Ruosna), naschius ils 10 da matg 1926 e morts ils 29 da mars 2009 e da Battista Levy-Soliva (Funs), naschius ils 17 da zercladur 1922 e morts ils 8 d'avrel 2009. Els ruaussien en pasch."

Gliesta da tractandas

La gliesta da tractandas secloma sco suonda:

1. Protocol nr. 2-2009/2012
2. Rapport da gestiun 2008 (messadi nr. 5-2009/2012)
3. Rapport da quen 2008

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen



1. Protocol nr. 2-2009/2012

President dil cussegl da vischnaunca Robert Cajacob

Il protocol nr. 2 ei vegnius tarmess tier per posiziun. Enteifer ils tschun dis fixai ei vegniu inoltrau neginas propostas per midadas.

Il protocol nr. 2-2009/2012 dalla seduta dils 27 da fevrer 2009 vegn approbaus senza opposiziun.

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen



2. Rapport da gestiun 2008 (messadi nr. 5-2009/2012)

President dil cussegl da vischnaunca

Tenor art. 27, al. 2 dil regulativ da fatschentas ei il cussegl da vischnaunca obligaus d'entrar e tractar il rapport da gestiun ed il quen annual. Perquei croda la debatta d'entrada, persuerter ha liug ina debatta generala.

President communal Dumeni Columberg

Visa sin il messadi, nua ch'ils fatgs ein presentai en detagl. El rapport da gestiun vegn dau detagliadamein plaid e fatg davart ils fatgs occurri durant igl onn vargau. Il rapport da gestiun dat la pusseivladad da tschentar damondas davart il proceder dallas autoritads communalas. Quei sa spargnar ina u l'autra intervenziun parlamentara.

Cusseglia Clemens Berther, president dalla cumissiun da gestiun

La cumissiun da gestiun vegn a prender posiziun tier ils singuls capetels. Sco igl ei vegniu secunvegniu, prendan ils singuls commembers posiziun tenor tematica. Els plaidan mintgamai en num dalla cumissiun. El engrazia grondamein alla suprastanza communal, als officials ed als collaboraturs communal per la buna lavur prestada.

Debatta generala

Il cussegl da vischnaunca desista d'ina debatta generala.

Senza opposiziun passa el alla deliberaziun en detagl.

Discussiun en detagl

Il cussegl da vischnaunca repassa il rapport da gestiun capetel per capetel.

Planisaziun locala – revisiun totala

President communal

Ladamein suenter l'approbaziun dil suveran ei la documentaziun vegnida suttamesa al Cantun per approbaziun.

El rom dalla publicaziun officiala ei vegniu inoltrau 5 recuors. Ins ha encuretga il discuors cun tuts recurrents. En in cass eis ei buca stau pusseivel d'anflar ina sligaziun, aschia che la suprastanza communal ha stuiu proponer da renviar quel. Cun ils ulteriurs quater recurrents eis ei stau pusseivel d'anflar il discuors e sligaziuns acceptablas. Ils quater recuors ein sin fundament dallas cunvegrientschas vegni retratgs.

La consultaziun interna tier l'administraziun cantunala – totalmein ein 15 uffecis involvi – ei terminada. La suprastanza communal ha dacuort retschert ina posiziun digl uffeci pil svilup dil territori ed ha la pusseivladad da prender posiziun leutier. Ils puncts centrals dalla revisiun vegnan legrevlamein buca contestai. Objecziuns derivan specialmein davart digl uffeci per la natira ed igl ambient, digl uffeci da catscha e pesca e digl uffeci forestal. En in punct u l'auter vegn ei ad esser pusseivel da vegnir encunter al Cantun.

Sche tut va sco previu, san ins quintar cun l'approbaziun dalla planisaziun entochen la fin matg 2009.

Cusseglier Giusep Columberg

Il cussegl da vischnaunca ha concediu in credit supplementar da frs. 40'000.-- per la revisiun totala dalla planisaziun locala. Pertgei corrispunda la summa cudischada el quen buca cun quella dil preventiv (cto. 790.581.00)?

President communal

Probablamein setracta ei d'ina damonda da cudischaziun.

Canzlist Andri Hendry

La summa el preventiv 2008 ei marcada cun ina steila. Quei vul dir ch'il credit supplementar seigi risguardaus. La contribuziun cantunala per la revisiun dalla planisaziun locala ei aunc pendent.

Cusseglier Flavio Murer

Per la sanaziun dalla Via Bugnei ha il cussegl da vischnaunca concediu in credit da frs. 154'000.--. Il preventiv preveda denton mo frs. 126'000.--. Schegie ch'igl ei vegniu construì igl atun 2008 in pulit tschancun dil mir, cuntegn il quen mo frs. 4'240.70. Pertgei han ins buca el preventiv la medema summa sco quella ch'ei vegnida concedida dil cussegl da vischnaunca e pertgei han ins cudischau sulettamein la summa da frs. 4'240.70?

President communal

El quen figurescha la summa pagada entochen il siaraquen. El preventiv figurescha la summa che la suprastanza communal quenta d'investar net. Il cussegl da vischnaunca ha concediu in credit brut tenor las calculaziuns digl inschignier.

Cudisch funsil – ina sligaziun regiunala

President communal

Dacuort ei igl emprem rapport da gestiun digl uffeci funsil Cadi vegnius repartius allas vischnauncas. Sut la resalva dall'approbaziun entras ils delegai se presenta il quen cun in gudogn da frs. 115'246.--. Da quella summa vegnan 10% scretts dabien allas reservas, ferton ch'il rest dil gudogn vegn repartius sin las vischnauncas en proporziun dallas fatschentas. La vischnaunca da Mustér survegn frs. 22'603.--. Igl uffeci ha giu las biaras fatschentas sil territori dalla vischnaunca da Tujetsch, sil secund plaz suonda la vischnaunca da Breil e silsuenter la vischnaunca da Mustér. Sco gia informau caschuna la registraziun digitala dallas parcelas considerabels cuosts supplementars.

Niev center communal d'infrastructura a Cuoz (pumpiers)

Cusseglier Clemens Berther, cumissiun da gestiun

La cumissiun da gestiun vegn a perseguitar attentamein igl andament da quei project e controllar sche las decisiuns pridias vegnan observadas. Quei pertucca era il credit concedius. Ins quenta saver retrer il luvratori entuorn miez uost 2009.

President communal

Cheu setracta ei d'in project che fa grond plascher. El progredescha stupent. Cun il credit concediu vegn ei ad esser pusseivel da realisar stabiliments supplementars.

Gerau Hans Huonder

El rom dil project eis ei previu da spazzar la Baracca verda e da construir ina halla da stialas. Quei ei necessari era a vesta dalla damonda carschenta per stialas. La gruppa forestala e la gruppa stradala ein vegnidas fusiunadas e senunman ussa menaschi tecnic. Las empremas experientschas ein positivas. Ussa va ei per ils detagls. La collaboraziun sa segir vegnir intensivada suenter ch'ins ha retratg las novas localitads a Cuoz.

Scolaziun e formaziun – La scola populara

Cusseglier Pader Vigeli Monn, cumissiun da gestiun

Quella sparta ha fatg empau furora igl onn vargau; cunzun l'entira discussiun en connex cun ils scolars dalla vischnaunca da Medel. La suprastanza communal ha adina informau la cumissiun da gestiun davart las contractivas. Las decisiuns han stuiu vegnir pridas enteifer cuort temps. Discussiuns han medemamein l'elecziun dil niev meinascola caschunau. En vesta allas informaziuns fallidas, che cursavan en la vischnaunca da Tujetsch, eis ei stau necessari d'intervegnir. Cun la decisiun dallas autoritads communalas da Mustér han ins saviu mantener ina persuna ella regiun, la quala havess giu las letgas da serender ella Bassa. Deplorablamein han ils presidents communalas dalla Cadi buca vuliu instradar las discussiuns necessarias per intensivar la collaboraziun denter las vischnauncas sil sector da scola.

President communal

Las tendenzas actualas en nossa regiun ein buca saunas. Sche nus lein rinforzar la regiun, eis ei necessari d'intensivar la collaboraziun. Perquei drova ei subcenters regiunals. La vischnaunca da Mustér ha sco capitala dalla Cadi ina funcziun da subcenter. En quei senn ha la vischnaunca era procurau per investiziuns che vegnan dabien all'entira regiun. Perquei ston las activitads per rinforzar quei subcenter vegnir intensivadas.

Gerau Hans Huonder

La cunvegnientscha cun la vischnaunca da Medel ei sut tetg. El decuors digl onn 2010 eis ei necessari da contrahar da niev. En connex cun la nova ulivaziun da finanzas eis ei semussau che la calculaziun dalla vischnaunca da Mustér cun rodund frs. 12'000.-- per scolar ei sut la media da biebein frs. 13'000.-- menziunada el rapport dalla Regenza. Las naschientschas muossan che la vischnaunca sa vinavon menar classas en in diember raschuneivel. Il diember da scolars ei en mintga cass memia aults per metter ensemen singulas classas.

Sanadad – Casa da tgira Sursassiala

Cussegliera Martina Gienal

Co s'avonzan las lavurs per la realisaziun dil project d'ina casa da tgira en Sursassiala? Dat ei eventualmeins ina sligiazion senza la vischnaunca da Tujetsch? Co se presenta la situaziun en quei cass? Cu sto il project esser realisau per ch'ins sappi recaltgar las contribuziuns cantunalas?

Cusseglier Victor Flepp, cumissiun da gestiun

Actualmeins cuoran sil sector dil sanidadesser discussiuns davart il carschament dils cuosts. Pigl onn 2010 quantan ins cun in augment dallas premias dallas cassas da malsauns ella dimensiun dad 8 entochen 12%. El cass dalla casa da tgira eis ei impurtont ch'ins anfli ina sligiazion da cumpromiss; forsa era en favur d'in auter liug, quei per avantatg d'in center da scolaziun a Mustér. Probablameins san las vischnauncas da Sursassiala buca selubir da spiarder las contribuziuns cantunalas en favur da quell'investiziun. La situaziun finanziaria lubescha buca da quels luxus.

La Casa da tgira Sursassiala siara cun in bien quen pigl onn 2008.

President communal

Quella fatschenta sespleiga buca sco giavischau. Entochen la fin digl onn 2008 havessen tuttas treis vischnauncas stuiu declarar da desister futuramein dallas partiziuns da tgira en la casa d'attempai existentas. La sligiazion ideala fuss ina casa da tgira cun 72 letgs sut il tetg dalla fundaziun Casa da tgira Sursassiala. Igl onn 2007 havevan las suprastanzas dallas vischnauncas pertuccadas signau ina declaronza da separticipar alla sligiazion comunabla. Per contonscher l'acceptanza politica ha ina gruppa da project fatg igl onn vargau studis intensivs. Quels muossan, ch'ina sligiazion comunabla porta considerabels avantatgs. Denton ei il clima politic semidaus ed ei vegn buca pli ad esser pusseivel da cattar il consentiment da tuttas treis vischnauncas.

Per survegnir las contribuziuns cantunalas sto il quen da baghegiar vegnir inoltraus allas instanzas cantunalas entochen sil pli tard la fin digl onn 2013.

Ei dess ulteriuras variantas, denton senza il sustegn cumplein dil Cantun. La secunda varianta prevedess ina partiziun da tgira cun 48 letgs a Mustér e 24 letgs a Tujetsch. La tierza varianta 43 letgs a Mustér, 17 a Tujetsch e 12 a Medel. Gest tenor la varianta che vegn realisada sto la regiun quintar cun cuosts supplementars d'investiziun ella dimensiun da 3.7 entochen 5.6 milliuns francs. Tiels cuosts da menaschi stuessen las vischnauncas quintar cun cuosts annuals supplementars da frs. 1'535'000.-- entochen frs. 1'946'000.--. Probablamein san las vischnauncas buca selubir in tal luxus.

En mintga cass ha il Cantun contribuì cun ina decisiun disgraziada a quella situaziun entras lubir da sias uras partiziuns da tgira en las casas d'attempai. Quella situaziun engreviescha considerablamein ina sligiazion prudenta.

Contribuziuns cantunalas dat ei mo sch'il project vegn realisau tenor il project inoltrau.

Cussegliera Martina Gienal

Ein las contribuziuns cantunalas ligiadas vid il liug Mustér? Paga il Cantun sias contribuziuns era sche buca tuttas treis vischnauncas separticipeschan a quei project?

President communal

Las contribuziuns cantunalas vegnan pagadas mo per ina casa da tgira cun 72 letgs tenor il project inoltrau. Ils letgs da tgira ston denton era vegnir renconuschi tenor las normas per obtener las contribuziuns che vegnan conderschidas dallas cassas da malsauns.

Cusseglia Clemens Berther

La cumissiun da gestiun ha bein investa el quen da menaschi dalla Casa da tgira. Sur dil quen decidan denton ils organs dalla fundaziun Casa da tgira Sursassiala.

Cusseglia Giusep Columberg

Tgei capeta en cass da dispeta cun la fundaziun resp. cun sia proprietad?

President communal

La fundaziun sa vegnir sligiada mo cul consentiment dil Cantun. En mintga cass ei la vischnaunca da Mustér stada fetg generusa a sias uras cun conceder a tuttas treis vischnauncas il medem diember da commembers e quei aschibein pil cussegl da fundaziun sco per la giunta.

La proprietad dalla fundaziun resta colligiada cun la fundaziun aschi ditg sco quella exista.

Straduns e vias cantunalas
Via Cavardiras/Via Pardomat

Cusseglier Giusep Columberg

Il cantun surdetti las vias avon ch'ellas vegnien sanadas alla vischnaunca. Aschinavon ch'il Cantun surdass quell'as duas vias avon temps alla vischnaunca, caschunass quei gronds cuosts. Co quenta la suprastonza communal a proceder?

Gerau Roger Tuor

La vischnaunca ha insistiu ch'il Cantun accelereschi la sanaziun da quell'as vias. Denton ha la vischnaunca aunc buca retschert ina risposta cuntenteivla. Il prighel che la vischnaunca sto surprender in mument quell'as vias ei latents. Perquei ei la suprastonza communal intensiunada da procurar che las vias vegnien sanadas en in temps nizeivel.

Cusseglier Giusep Columberg

Tgi decida cura ch'il quorum da 30 persunas ei contonschius e cura ston ins temer che la via a Pardomat vegni en possess dalla vischnaunca?

Gerau Roger Tuor

Il diember da 30 persunas ei fixaus en art. 7, al. 2 dalla lescha cantunala da vias digl 1. da schaner 2005. La decisiun croda entras la Regenza. Per la via da Pardomat ei il project avon maun. Las lavurs da projectaziun vegnan denton retardadas entras ils uffecis cantunals.

Serenera e canalisaziun

Cussegliera Martina Gienal

La vischnaunca ha realisau differents projects per la separaziun dall'as auas. San ins circumscriber procentualmein tgei cumpart dalla surfatscha pertuccada ch'ei gia realisada?

Gerau Roger Tuor

En connex cun la sanaziun da vias han ins adina dau atenziun alla separaziun dall'as auas. Definitivamein ei sulettamein la dismessa dall'as auas piarsas a Mumpé Tujetsch realisada. Ins ha bein realisau differents projects, denton eis ei entochen oz per gronda part stau necessari da menar las auas alla fin dalla via puspei en la canalisaziun d'aua tschuffa. La separaziun dall'as auas dependa grondamein dil svilup dalla sanaziun dall'as vias communalas. In problem ein era las biaras fontaunas (begls) dall'as qualas la deflussiun ei colligiada cun la canalisaziun d'aua tschuffa.

Rapport forestal

Il rapport forestal ei aschuntaus al rapport da gestiun.

Prevista

Cussegliera Martina Gienal

Tenor il rapport interqueran ins actualmein differents projects da vias d'uaul. Han ins era previu da sanar la Via Run a Latis? Tgei tschancuns duein ulteriuramein vegnir reparai?

Cusseglier Giusep Columberg

El rapport vegn numnau entgins donns d'uaul capitai igl atun vargau en connex cun la neiv. Ha ei dau ulteriurs donns ed ei era igl uaul da protecziun tangaus?

Gerau Hans Huonder

Ins ei actualmeins vid elavurar duas studias. Ina pertucca igl uaul denter la Schetga da Madernal. Muort differents prighels da crappa eis ei semussau ch'igl ei necessari da construir sin in tschancun dad 1.5 km ina via per saver prender las mesiras da segirtad corrispundentas sco era per la raccolta da lenna e la tgira digl uaul.

La Via Run ei a Latis relativamein stretga. Per saver slargar ella eis ei necessari d'acquistar terren. Ina sligiazion ei per part era tecnicamein fetg greva. Ins ha perquei retschercau ina varianta naven dalla Val Sogn Placi, ha denton stuiu schar curdar quella sligiazion pervia dalla pendenza. Actualmeins interqueras ins ina sligiazion naven dalla Val da Cuoz sur Pardi ella Val Calvaniev. Cun quella sligiazion savess ins contonscher igl uaul denter la Val Aletta e la Val Clavaniev. El decuors digl onn vegn ins a giudicar ils resultats da quella studia.

La vischnaunca dispona oz d'in tagl da lenna da 3'500 m³, las nevadas digl october e november han derschiu ca. 2'500 m³. Il luvrar si quella lenna caschuna ina gronda lavur supplementara, tonpli ch'ella ei spatitschada sur l'entira surfatscha dalla vischnaunca. Evtl. eis ei necessari d'engaschar interpresas privatas per dar damogn.

Cusseglia Giusep Columberg

Ston ins evtl. quintar cun midadas dil prighel da lavinas?

Gerau Hans Huonder

Pil pli buc. Evt. drova ei mesiras en la Val Mala.

Ils prezis da lenna ein il davos temps sereduci per ca. 30%. Ord quei motiv vegn ins a luvrar si, respectivameins pinar mo la lenna ch'ei absolutameins necessaria. Cunquei che bunameins igl entir tagl da lenna annual schai per tiara, vegn ins probablameins a desister uonn da realisar novs tagls da lenna.

Decisiun:

Cun 13 encunter 0 vuschs approbescha il cussegl da vischnaunca il rapport da gestiun 2008.

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen



3. Rapport da quen 2008

President communal

Visa sin il messadi, nua ch'ìls fatgs ein presentai en detagl. Ins astga esser satisfatgs dil resultat contonschiu. Quel ei staus pusseivels grazia alla buna disciplina budgetara d'ina vart e grazia allas entradas supplementaras da l'autra vart.

Cusseglhier Clemens Berther, president dalla cumissiun da gestiun

"La cumissiun da gestiun ha priu fetg serius l'incarica adossada ed ha tractau detagliadamein il quen communal 2008 ensemen cul biro fiduziari REVIBÜNDE, cun il responsabel digl uffeci da vischnauncas Giachen Caduff e la suprastanza communal. Per la revisiun tecnica dil quen ein ils dus revisurs Edgar Durschei ed Arne Nold responsabels.

La cumissiun da gestiun constatescha sin fundament dils rapports dils cussegliaiders externs, sco era sin fundament dallas controllas fatgs sezzas e dallas informaziuns davart dalla suprastanza communal, che quen e gestiun pigl onn 2008 dalla vischnaunca da Mustér constattan agl uorden da finanzas ed allas prescripziuns surordinadas.

Sulettamein tier la sparta 710 canalisaziun e serenera cuvieran las entradas buca las expensas. Ina miglior ei indispensabla. Quei ei denton ina decisiun politica che sto vegnir ponderada e preparada dalla suprastanza communal per mauns dil cussegl da vischnaunca.

La cumissiun da gestiun ha fatg cumparegliaziuns pertuccont ils cuosts da personal cun las autras vischnauncas vischinontas, sco era da quellas da pli lunsch. Ella ha constatau che quels cuosts svarieschan fetg minim. Quei vul dir che nossa vischnaunca vegn administrada cun fetg bien senn da responsabladad e las resursas vegnan nezegiadas bein ed efficient.

La cumissiun da gestiun engrazia per la gronda lavur che vegn prestada per vischinas e vischins entras il president communal e la suprastanza communal, sco era al cussegl da vischnaunca ed a tuts emploiai. La cumissiun da gestiun ha grond respect ed aulta stema per tuts funcziunaris communal.

Nus engraziein era alla suprastanza communal per la fetg buna collaboraziun."

Debatta generala

Il cussegl da vischnaunca desista d'ina dabatta generala.

Senza opposiziun passa il cussegl da vischnaunca alla deliberaziun en detagl.

Discussiun en detagl

Quen current 2008

*Ctos. 2** 462.00 Contribuziun da scolars d'ordeifer*

Cusseglier Giusep Columberg

Pertgei motiv sedifferenzieschan las contribuziuns da scolars d'ordeifer denter quen e preventiv? Eis ei buca pusseivel d'eruir quella summa sin fundament dil diember da scolars?

Gerau Hans Huonder

La differenza seresulta specialmein dil diember dallas lecziuns per la classa pintga. Cheu eis ei buca pusseivel d'eruir ordavon il diember dallas lecziuns.

Cto. 340.392.01 Tscheins intern Center da sport e cultura

Cusseglier Pirmin Lozza

Pertgei figurescha quella summa buca sco entrada el quen da menaschi dil Center da sport e cultura?

President communal

Tiel quen communal setracta ei d'in quen detagliu, ferton che quel dil Center da sport e cultura ei in quen global. L'incarica dil CSC sebase sin ina cunvegnientscha da prestaziun.

Sparta 940 Tscheins

Cusseglier Flavio Murer

Pertgei ein ils tscheins pils emprests s'augmentai, schegie ch'ils emprests ein sereduci? Dat ei evtl. la pusseivladad da profitar tier ina refinanziaziun dils tscheins favoreivels?

President communal, canzlist communal

En vesta als tscheins actuals eis ei donn ch'ins ha giu fatg emprests a liunga vesta. Tier la refinanziaziun vegn ins ad intercurir, schebein ina sligiazion a liunga ni a cuorta vesta ei pli cunvegnenta.

Mintgamai alla fin digl onn eis ei per motivs dalla liquiditad finanziaria stau necessari da prender si in emprést da frs. 1'000'000.-- a cuorta vesta. La fin 2008 ei quei buca stau il cass, quei che ha effectuu ina reduziun dils emprests. El decuors digl onn 2007 ein ils emprests a liung termin denton vegni augmentai per frs. 500'000.--, aschia ch'ils tscheins dils emprests ein levamein s'augmentai igl onn 2008.

President dil cussegl da vischnaunca

Dat la pusseivladad da revegnir ad in conto u l'auter.

Cto. 560.366.00 Promoziun d'energias regenerablas

Cussegliera Emerita Flepp-Degonda

Ins ha intervegniu che quei conto seigi vegnius schelentaus e ch'ei vegni pil mument fatg negins pagaments. Per tgei motivs?

President communal

Schegie che la vischnaunca ha concediu ils davos onns numerusas contribuziuns ei la summa budgetada buca vegnida augmentada, quei per motivs da spargn. Ils petents han cun la disposiziun survegniu l'informaziun ch'ils pagaments succedien el rom dallas pusseivladads dil

preventiv. Pigi onn 2009 ei quella summa gia absorbada e perquei ein pil mument negins pagaments pusseivels. Dil reminent vegn quei sistem era praticaus tiel Cantun e la Confederaziun. Mo aschia eis ei pusseivel da respectar il preventiv.

La suprastonza communal füss per motivs finanzials plitost dil meini d'abolir quellas contribuziuns. Quei vegn denton strusch ad esser pusseivel.

Quen d'investiziun 2008

Negina discussiun

Bilanza 2008

Negina discussiun

Center da sport e cultura, quen e bilanza 2008

Negina discussiun

Casa da tgira Sursassiala, quen e bilanza, per informaziun

Neginas damondas

President dil cussegl da vischnaunca

Dat la pusseivladad da revegnir ad in conto u l'auter.

Decisiun:

Cun 13 encunter 0 vuschs decida il cussegl da vischnaunca da:

- 1. approbar il quen 2008;*
- 2. suttametter il quen 2008 al referendum facultativ conform agl art. 21, lit. a dalla constituziun communal.*

Communicaziun

President dil cussegl da vischnaunca

La proxima seduta dil cussegl da vischnaunca ha liug venderdis, ils 19 da zercladur 2009. Per la seduta dils 21 d'uost 2009 duei il cussegl da vischnaunca reservar il suentermiezdi sco la sera.

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen